

## Presidente nobo: restructuración y maneho transparente pa Asocol

**ORANJESTAD** – Presidente di Asociación Amigos di Colombia (Asocol), Moises Fernandez kier bin cu un maneho nobo. Dia 25 di juni ultimo durante un asamblea general, sr. Fernandez a wordo eligi como presidente di e hunta directiva nobo pa duna forsa na e asociacion aki cu a perde basta miembro.

El a laga sa cu un di su meta ta esun di restructura completamente e asociacion aki; y bin cu un maneho transparente di nan fondonan manera nan statutan ta stipula. E presidente nobo ta bisa Bon Dia Aruba cu e kier rescata loka e ta considera e obhetivo principal di Asocol cu ta esun di traha pa atende e necesidad di e comunidad Colombiano na Aruba. E ta e comunidad mas grandi di hendenan di afo cu tambe tin nan propio problemanan riba nos isla. “Mi kier reactiva e asociacion aki. E ta pasando den un situacion no mucho bon of dificil.”

Un di e retonan cu e ta considera como principal ta esun di e clarificacion di e status cu e asociacion tin pa bin cu e proyecto di nan sede. Sr. Fernandez ta bisa cu tin debenan pendiente y mester check e maneho financiero di e asociacion. Tambe nan kier revisa nan statutan pasobra e ta haya cu nan ta demasiado bieu.

### Fondo y transparencia

Sr. Fernandez ta indica cu ainda transicion entre e directiva anterior cu esun nobo no a tuma luga completamente. E ‘proceso normal’ mester ta cu e directiva anterior mester rindi cuenta na e directiva cu a wordo instala recientemente, segun e. Pero te ainda e proceso aki no a sosode; pero nan kier pa e proceso aki lo por sosode pronto.

Nan a haya caba algun documentonan; pero e parti di notula, asamblea, administrativo y financiero no a sosode ainda. Sinembargo e ta reconoce cu e directiva anterior supuestamente ta realisando e proceso aki.

“Mi ta spera cu prome cu fin di luna nos lo por haya e informacion aki”. E ta haya relevante pa obtene e informacion aki pa asina nan miembronan lo por ta debidamente informa. “Ta nos obligacion pa nan haya e informacion aki”. Tur esaki ta para den e statutan vigente di Asocol..

Sr. Fernandez ta agrega cu ora e ta papia cu e directiva anterior mester duna cuenta, e ta referi no solamente cuenta di nan actividad, reunion y/of evento; sino cuenta financiero tambe. “Nos si lo kier organisa nos directiva ya cu e ta nos obligacion di organisa nos directiva for di un punto di bista mas cla y transparente.”



### Sede nobo

E ta sigui bisa cu e kier traha duro pa asina congrega un biah mas nan compatriotanan y tambe na e hendenan di otro comunidad na Aruba cu tambe lo por forma parti di e asociacion aki. Ya caba nan a organisa dos actividad. E prome tabata uno protocolario en conexion cu dia di Colombia; y e di dos mas festivo, social y familiar pa recauda fondo den rancho Villa

Floralina.

Nan kier cuminsa recauda fondo pa atende cu algun debe y trabou pendiente. Tambe nan kier visualisa con nan por proyecta e asociacion aki. Sr. Fernandez a bisa cu e asociacion aki no tin fondo actualmente, pero locual awor si ta planea.

Encuanto e proyecto di construi nan sede bou e nomber: Casa de Colombia na Aruba,

directivanan anterior a haci diferente esfuerzo, entre nan haya un tereno y bin cu actividad como e donacion di material di construccion entre otro pa cuminsa traha e fundeshi y cuminsa lanta e sede aki. Sr. Fernandez ta bisa cu actualmente ta existi un tereno cu un fundeshi basha. Pero te ainda e directiva nobo no ta mucho informate hasta ki punto el a sosode y con e colecta y donacion a wordo maneha.